



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : Tir Yimym

tiryimym@aolima



tir yimym

TAPAK 8

Ken o mejembi tashi J&K nung rara manentsü: Farooq Abdullah

Asian Games: Odisha CM-i state nungi asayartem nem teyari agütsütsü nangzük



VOL. XX NO. 333 (ADOK 333) DIMAPUR YANGTEPNÜ (THURSDAY) RONGJUI (SEPTEMBER) 14, 2023 ₹ 5.00

Mokokchung-Mariani lenmang nung anentsüh aluba tesem tongti 2 asadanger

Mokokchung, September 13, 2023 (TYO): Mokokchung-Mariani na tsungda NH-702 (D) lenmang nung anentsüh kanga mejungi anena aodak tesem ana-ka Mokokchung town kübok Mongsenbai ward (Sewak gate nungi tatsüka pilar) aser kaji Chungtia lushi KM 19 nung lir, anaji asadangsü atema department of Geology and Mining nungi mongin telok ka Mokokchung tonga lir aser iba maparenji Executive Engineer, PWD (NH) Division II, Mokokchung-i achayanga inyadaksür, ta E.E, PWD (NH) Mokokchung, Limatoshi-i osangzülurtem den jembidang metetdaksü.

Mokokchung-Mariani NH-702 (D) kilometer 0 ya Mokokchung Sewak gate nungi tenzüka kilometer 63 tashi dang PWD NH division II, Mokokchung-i repranger. Iba tsungta nung anentsüh aluba tesem 6 shi lir, saka parnoki asadangsü atema tesem anaji shimtet, ta pai ashi.

Taoba ita 22nd August, 2023 nü Nagaland Chief Engineer (National Highways)-i anir par külem sorkar ketdangsürtemi lenmang balala semyonga jajaba mapang iba asadangsü mapa ya inyaksü jembia liasü, ta paisa shisem.

Asadangba (investigation)



Mokokchung town kübok Mongsenbai ward ajanga aoba NH 702 (D) lenmang meyi tsüngküm kecha mali teti shia anentsüh aluba tesem noksa nung angur. Mokokchung, 13th September, 2023 .

telokji - David Lhoupenyi (Geologist)-i anir Vilzoto Valeo (Asst. Geologist), Neveyo Vero (Asst. Geologist) aser Sune M (Asst. Geologist) par pezü den ano staff kar densema parnok 7 arua lir. Parnoki asadangba mapaji Sept 11 nungi tenzüka maparen balala inyak tenzükogo. Sept 11 nungi 13 tashi Mongsenbai Ward nung aliba anentsüh tesem nung asadangba mapa inyakogo aser asung nungi Chungtia lushilen inyaksü aser parnok ya Hogulbarnü tashi alitsü.

Geologist David-i ashiba agi, Nagaland nung anentsühji teimbaka tzü aliba ajanga anener, anungji, ibala mesükba timtem kar alitsü südi ta bilemer aru, saka Mongsenbai Ward nung aliba

tesem yabo imlaba ama masü, ibai tera balaka asünung kanga junga asadangsüsa akümtsü, Chungtia indangjibo asadanger dang shitettsü, ta pai ashi.

Iba kanga junga asadanger kechi inyak nung anentsühji anendaksütsü, item lenmangtemji bushitsü aser iba maparen ya taruba hopta tashi nungbo tembangtetsü imlar, ta pai ashi. Iba amala anentsüh aluba ya Nagaland nung kanga bulur, protection wall anangba kisung jagi majungsü, anungji, scientific inyakyim kar amshia inyak nung dang ajungsü, ta paisa shisem.

Asadanger teloki jagi ali telung nung perezpa machine-tem amshia asadangba maparen tapu balala tenzükogo. Department ana senteper lenmang tebilemtsü

balala atema iba ama külemi inyakba ya jangratemsüka lir, anungji, PWD (NH) dang iba mapa achayangba asoshi paisa pelaba lemsatep.

Mokokchung-Mariani NH-702 (D) lenmang ya 2016 küm PWD NH-i agi, iba sülen lenmang terara yanglushiba mapa kar inyak. Iba sülen 2021 Jan nung NHIDCL-i special repair asütsü atema agi aser tanü tashi parnoki reprangdar. Tangji New Camp - Longtho tashi lenmang kanga majung, anungji, tamajungdak terara yanglushitsü sentong lir, saka garitsung 10 dak tema adenba garitem iba lenmang nung khen mejajadaksütsü asoshi Mokokchung DC dang shidanga lir, ta E.E NH-i metetdaksü.

NH-702 (D) ya-a 2 lane

yanglutsü asoshi tang asamayang agiba mapang lir, sangküm January tashi nungbo DPR renemer yoktsü imlar, kodang temelaba ngudir, iba sülenjiang maparen tenzüksü. Saka iba mapaji tenzüka mao tsungta lenmang tamajungdak yanglushitsü atema short term maintenance atema DPR ka renemer yoka lir, saka ajibo bitumen mapa atema masü, ta paisa jangjashitsü.

Mokokchung nung lenmang kanga majungba dak sentakba nung 12th Sep, 2023 nü NHIDCL, PWD (NH), PWD (R&B), Ao Senden aser All Ward Union Mokokchung Town ketdangpurtem den telungjem senden ka menogo aser lenmang tajungba renloksü asoshi akokba tashi kadi ka den yariteptsü bangjemtep.

Department of Urban Development nung officer aparaba ajanga Mokokchung-i UDO meyokteti lir, iba ajanga maparen aika nung tetsükdaksü ajurur. Iba den ano lenmang yanglutsü atema senotsü kecha arua mali, anungji, sorkar nungi senotsü kodang arudir, maparen ajakji tenzüka aotsü aser town kübok highway süiba lenmangtem PWD NH ajanga anepalutsü mapa lemogo, ta Mokokchung DC, Thsuvisie Phoiji-i metetdaksü.

Centre-i Rs 1,650 crore endoka LPG connections angati agütsütsü

New Delhi, September 13, 2023 (Agencies): Union Cabinet-i Bodbarnü Pradhan Mantri Ujjwala Yojana (PMUY) ulushitsü mulunga agizükogo aser iba ajanga iba scheme nung ano makamaiteer kibong lakh 75 benenloksü.

Iba scheme ya küm asem tsungda Rs 1,650 crore endoka inyaksü.

August 29 nü Centre sorkari domestic LPG cylinder nung Rs 200 ajemba aser PMUY beneficiary base 9.60 crore aliba nungi 10.35 crore akümtsü osang sangoktsüba sülen Bodbarnü Cabinet-i PMUY expansion mulunga agizükogo.

Taküm state pungu nung Assembly elections agitsüba aser sangküm Lok Sabha elections matongdang LPG cylinder jenjang ajemba aser PMUY expansion indang osang metetdakja liasü. Iba ya Raksha Bandhan aser Onam benjung tenung nung sorkari nübertem nem sempet agütsür ta Centre-i ashi.

2023-24, 2024-25 aser 2025-26 nung PMUY atema Rs 1,650 crore endokba nung kümshia 14.2-kg cooking gas cylinder 12

refill asüadang Rs 200 agütsüba dena mali.

PMUY kübok sensaker kibongtem nungi tetsürtem nem cooking gas connections agütsür. Iba scheme kübok stove aser mezüngbuba cylinder angati agütsür. Maneni cylinder shia Rs 200 subsidy ya OMCs ajanga bank transfer asür aser Centre sorkari OMCs nem senji agütsür.

“Kibong kar nung LPG (liquefied petroleum gas) connection mali. Nütsung yongsük teimba akümba, kiyimba, kibongtem balala aliba, meta talang nung pilar aliba ajanga LPG connection masür. PMUY ya takok angubua social welfare scheme ka ta tenüngsang agütsür aser iba ajanga 2016 nungi linük nung LPG penetration 62% kümogo” ta Bodbarnü Centre-i metetdaksü.

“Ujjwala Scheme 2.0 nung latetba ama Ujjwala beneficiaries nem mezüngbuba refill aser stove angati agütsütsü” ta Information and Broadcasting Minister Anurag Singh Thakur-i Bodbarnü osangbener den jembidang ashi.

Manipur MLA 18-i PM aser HM den ajuruteptsü apusogo

Imphal, September 13, 2023 (Agencies): Manipur nung BJP-i aniba sorkar nungi MLA 18-i Prime Minister aser Union Home Minister na den ajuruteptsü atema Bodbarnü New Delhi-i ogo.

Manipur Education Minister Th Basantakumar aser Social Welfare Minister H Dingo nati September 11 anogo BJP MLA

temi tezüngzüktep agiba asangsang nung ataloktsü atema MLA telok anir apuso.

September 11 aonung Manipur nung BJP-i aniba sorkar nungi MLA 23-i state litsü kümzuka ayutsü atema tezüngzüktep agia liasü.

Iba tezüngzüktep ya Chief Minister secretariat nung tawa

tasen tentetba civil society organization- Youth of Manipur (YoM) züngsemtem lia sign sütep.

Manipur litsü kümzuka ayutsü, ketdangsübaren balaka magizüksü aser Central lennirtem dang tebilemtsü tekaratiba nung koktetsü atema teyari meshitsü atema MLA temi bangjemtepa lir.

Nagaland nung hotel ana 4/5 star jenjang nung ajungkettsü

Kohima, September 13, 2023 (TYO): Nagaland nung hotel ana 4/5 star hotels akümtsü atema Bodbarnü Department of Tourism, Nagaland aser Hotel Polo Towers Group, Meghalaya tsungda MoU ka nung sign sütepogo.

Iba tenangzüktep nung Tourism Director Kedusie Metha aser CEO & Director Polo Hotels Group Deval Tibrewala nati sign sütep.

Hotel Japfu nung agiba sentong nung Tourism & Higher Education Minister Temjen Imna Along aser MLA Kevipodi Sophie na aden.

Iba tenangzüktep ajanga Nagaland nung tourism kanga renloksü. Dimapur Tourist Lodge nung Mall dena 4/5 Star Hotel ka aser New Millennium, Kohima yanglushitsü.

Iba mapatong anaprong ya

Public-Private Partnership (PPP) model nung inyaksü aser Design, Build, Maintain, Operate, Manage, and Transfer (DBMOMT) basis nung inyaksangshia aotsü ta MoU nung shia lir.

Dimapur mapatong nung top-of-the-line accommodations, multiple dining venues, entertainment centers aser retail shops alitsü.

Külen, Kohima mapatong nung business aser leisure travellers atema temulung agüja inyaksü. Item mapatong ana ajanga Nagaland nung tourism ajungkettsü aser rongsenketzüng tsütsü terenlok alitsü.

Tourism Department aser Hotel Polo Towers Group nati mapang telatet nung mapa tajungtiba inyaksü nangzüktepogo.

“Iba tenangzüktep ajanga

Nagaland tourism sector tejakleni aotsü. Hotel Polo Towers Group-i northeast nung aika ajangshia lir anungji parnok den külemi inyaksemsü yongyar” ta Tourism Director Metha-i ashi.

“Nagaland sorkar Tourism Department den külemi yaritepa aotsüba ya maongka ka lir. Iba ajanga hospitality sector ajungketba dang masü saka mapa adoktsü aser rongsenketzüng aintsü. Onoki northeast nung tongtipang yimti shia nung hotel ka alitsü atema onoki alizüng lir aser iba nung iba ya shilem ka lir” ta Polo Towers Group nungi Tibrewalla-ia ashi.

Tourism Department aser Hotel Polo Towers Group ajanga Chief Minister Neiphiu Rio aser Minister Temjen Imna Along-i anir Department dang pelaba metetdaksü.

Department of F&AR ajanga 'ice-box' aliba bikes lema agütsü



Kohima, Rongjui/Sept. 13 (TYO): Azadi Ka Amrit Mahotsav nungtem nung Department of Fisheries & Aquatic Resources (F&AR), Government of Nagaland ajanga zünger mapa mangu aliba lanurtem nem Bodhbarnü Ice Box keter aliba motorcycle 20 lema agüja liasü.

Item motorcycle lema agütsüba sentong ya Directorate of Fisheries & Aquatic Resources, Kohima nung Pradhan Mantri Matsya Sampada Yojana (PMMSY) kübok CSS Programme nung shilem ka ama agia liasü, koba

September 10, 2020 nung linük ajungalen semzüka liasü.

Iba sentong nung jembidang, MLA aser Advisor, Fisheries & Aquatic Resources, A. Pangjung Jamir-i ashiba agi, ango ya kanga mela shisa aoba chiyongtsü ka lir, kechiaser pua aliba ango tem temokong nung meyura mapang talanglang malir.

State nung zünger mapa mangu aliba lanurtem ango ayokba mapa inyaksü ajungmesoa department-i ice box aliba motorcycle tem agütsüba atongtet, ta pai ashi.

Ango metsürtem aser

entrepreneurs nem marketing tsütsü yaria pei sasa pei poksünga lidaktsütsü nukjidong nung iba sentong ya tenzü, ta Advisor Pangjung-i ashi.

Iba ya ajanga parnok ango belenshiba nung facility tajungba agütsütsü aser ango akoksaba nungi kumzüksü aser nisung achitsü asoshi ango tajung agütsütetsü, ta ashi.

Ajidang masü ano tetsung pezü aketba gari temi motetdak tesem tezülen nunga ango agütsütetsü nukjidong nung iba mera ya agi, kechiaser Nagaland ama North Eastern Region timba tenem-longren agi

sünga lir aser ango tsübo ya yimya agi lenden aser tarok nung yanglur, kong lenmang tajung mali, anungji ango bendena aser ayoktsü asoshi tetsung ana aketba gari ya tajungtiba lir, ta Advisor-i ashi.

Advisor Pangjung-i ice box den motorcycle angur ajak dang item maangka tanungtiba nung bendanga agütsür amshitsü aser department ajanga tuyuba ama inyaksü ayongzüka liasü.

2022-23 kum National Fish Production ya metric tons lakh 174 lir, koba 2013-14 dang shilem 81 agi timba, anungji global market nung India ya 'third largest fish producing country' lir, aser tzü nung anguba chiyongtsütem bendang lima nung oa ayokba nungi sen crore 57,586.48 tashi yokzüker, ta pai ashi.

Additional Director of F&AR, Lotimenba-i ashiba agi, ango raksaba nungi kumzüksü aser ango metsüba tesem nungi

kiosks/market tem tashi belener arutsü aser jenjang tajungba nung yoktetsüba tesem tem bushia bener otetsü mechi ice box aliba motorcycle tem ya lemtsür.

Department ajanga 2020-21 mapang fund aruba nungi tendanger ama motorcycle ana lema agütsüogo, ta pai ashi.

Motorcycle ana ya junga aser tajangzük lia amshiba ngua Department-i 2022-23 asoshi motorcycle 20 alitsü benok aser Central ministry ajanga PMMSY kübok agütsü, ta pai ashi.

Item motorcycle aliba yimya ya 60:40 lir, kong Central aser State sorkar lungjemer motorcycle jenjang shilem 60 agütsür aser teyari angur temi shilem 40 agütsür.

Ketdangsüri iba teyari agirtem dang MoU nung aliba ama motorcycle ya kanga kumdanga aser ango ayokba nung dang amshitsü ajungshi aser nüburttem nem service tajungtiba agütsütsü merangang, ta ayongzüka liasü.

Iba teyari agirtem inyakim district ketdangsür temi meita repringtsü aser shidak nung mamshira meyipa meshitsü, ta Director, Fisheries & Aquatic Resources, Rongsennungba-i osangbener dang ashi.

Iba sentong nung menden Secretary F&AR Sotsula liasü aser Medo Nakhro-i sarasadema sentong tenzüka liasü.

Kohima nung Street Food Vendors nem training agütsü

Dimapur, Rongjui/Sept. 13 (TYO): National Association Street Vendor of India (NASVI) ajanga ayongzüka Project Serve Safe Food: Training of Street Food Vendors sentong Deputy Commissioner, Kohima indang Conference Hall nung September 13, 2023 nü tenzükogo, koba Food Safety Authority, Nagaland teyari nung agir.

Department balala nungi state sorkar ketdangsür aser Kohima district nung chiyongtsü ayokertem pela agizükba o jembidang Subrata Banerjee, Head, Branch Corporate Affairs, Nestle India Ltd. ajanga ashiba agi, yimtung nung chiyongtsü ayoker nem training shidak agütsütsü mechi Nestle

India ajanga NASVI aser local food authorities den 2016 kum teka amtepa liasü.

"Food safety" aser "Hygiene" asoshi yimtung nung chiyongtsü ayoker nem training agütsütsü nungdak ta Nestle India-i angatet, koba ajanga nüburttem nung chiyongtsü tajung agütsüba kisüng masü saka vendors tem asoshia jenjang tajungba agütsür, ta pai ashi.

Iba training sentong nung 'health and hygiene that includes personal hygiene and cart hygiene'; 'food handling and food safety'; 'cleaning & pest control' aser 'waste management - garbage disposal' onüktem densema yanglua lir.

Kohima Street Food Vendors

asoshi iba training sentong ayongzüksüba atema Department of Health & Family tenüng nung Joint Secretary, Health & Family Welfare, Nokchasashi ajanga Nestle India Ltd. nem tenüngsang agüja liasü.

State yimtiba aser Dimapur nung street food vendors tem jateta adokba ngua, vendors tem asoshi mürekmeju yimyattem amshitsü tongtipang kumogo, kechiaser parnoki yangluba chiyongtsü ya tanur-tain ajungai achir, ta pai ashi.

Anungji vendors temi iba maangka agia training nung temolung agüja adentsü aser pei business nung temolung lemteta inyaksü pai ayongzüka liasü.

(Maneni tapak 8 nung...)

NHAK nung Ayushman Bhavan semzüko

Dimapur, Rongjui/Sept. 13 (TYO): Kohima district asoshi ADC Kohima, Rhosietho Nguori-i September 13, 2023 nü NHAK (Naga Hospital Authority Kohima) nung Ayushman Bhavan semzüksüogo.

Iba sentong nung jembidang Ayushman sentong nung pa shilem agidaktsüba asoshi medical team dang pelaba lemsatop. Temang anepaluba nung temolung agütsütsü indang jembidang, mürekmejua alitsü aser chiyongtsü tajung achi-ajemtsü ashi.

"Temang nung timtem ajemdaktsütsü asoshi chiyongtsü shidak aser takum libaliru shidak nungdaker. Anema alibaji rongsen ta shin o nung aliba lephsia ashidang, tanübo anema aliba ya rongsen

dang temaba lir, ta ashi.

Temang anema ayuba aser iba dak sendaka aliba achi-ajemba aser takum yimya indang nüburttem nem angatetdaktsütsü asoshi ajaki inyaksüla, ta pai ashi.

ADC, Kohima, Nguori-i stakeholders, arogo aser NGOs tem dang iba mission ya ajaki prokshitsü aser tatemlak nung aliba yimtsüng tashinung oa nüburttem nem angatetdakja iba mission nung takok angutsü ayongzüka liasü.

Kasa sentong nung Dr. Imnapokim-i 'Eye donation' indang slide show ka sayuba mapang, alima nung second pongu shia nisung ka tenük mejungi akumer aser 'corneal blindness' anepalutsü tongtipangtiba lenmangji 'corneal transplant' dang lir aser

ibaji tenük tenla agütsüba ajanga dang inyaktetsü, ta ashi.

Tawa state nungi nisung 40 shii pei tenük tenlatsü nangzüka lir, ta paisa metetdaktsü.

Dr. Avila Sangtam-i blood donation inyakim indang jembidang, parnoki azü tenlatsü asoshi awareness agütsütsü atema college balala sema jajaogo aser college balala nungi volunteers temi pei indang azü tenlaogo, ta ashi.

Azü tenla agütsütsü asoshi awareness agütsütsü mechi parnoki ano danga college tem semdangtsü, ta laisa ashi.

Kasa sentong nung Chairperson aser MD, NHAK, Dr. Sendimeren-i Ayushman Bhavan indang scheme rateta shia liasü.

(Maneni tapak 8 nung...)

Mokokchung DPDB senden September 19 nü amentsü

Dimapur, Rongjui/Sept. 13 (TYO): Ita shia amenba Mokokchung District Planning and Development Board senden September 19, 2023 anepdang 11:00 ako nungi amentsü, ta Deputy Commissioner & Vice-Chairman, Mokokchung,

Thsuvisie Phoji-i sangdong ka nung metetdaktsü.

Iba senden ya Deputy Commissioner, Mokokchung indang Conference Hall nung amentsü. Anungji züngsem ajak iba senden nung medema arua adentsü metetdaktsür, ta sangdong ajangasa ashi.

Mokokchung nung Immunization Campaign tenzüko

Dimapur, Rongjui/Sept. 13 (TYO): Deputy Commissioner & Chairman, DTFI, Mokokchung, Thsuvisie Phoji-i sangdong ka ajanga ashiba agi, Government of India indang totuyuba nung ajemdaker arishi kum 0-5 tsüngta tanurtem aser mashisa aliba tetsürtem Immunization magi alirtem asoshi 2nd Round of Intensified Mission Indradhanush (IMI) 5.0 sentong September 11, 2023 nü tenzüko aser September 16, 2023 tashi alitsü.

Vaccine agütsüba medical ketdangsürtem iba amala cases anepalutsü asoshi training kanga junga agir lir. Iba vaccine yagi tanurtem takum agiba tashidak 12 nungi kumzüker, koba dang 'vaccine preventable diseases' ta ajar.

Pei sasa tenüng zülüoka anasatiba immunization site makaa ayutsü asoshi Government of India-i UWIN app ka yangua lir. Anungji nüburttemi mobile phone nungi

Vaccine nung timtem kecha mali, kechiaser sorkari amshitsü memeladang kanga junga tendangogo. Iba vaccine agiba sülen nisung kar temang tera metar aser kar mozü agidak tera angor. Vaccine agir nisung lakh 10 nung ka dak dang 'serious allergies reaction' alir aser ibaji vaccine agir minute 30 tsüngta ataloker, ta ashi.

h t t p s : / / uwinselfregistration.mohfw.gov.in/ login nungi pei sasa tenüng zülüoktsü akok mesüra anasatiba immunization tesem nung tsüngtong oa tenüng zülüoktsü akok. UWIN app ajanga vaccine agitsü asoshi tenüng zülüokba mapang Aadhaar card aser phone number agütsütsüla, ta sangdong ajangasa ashi.



Gandhinagar, September 13, 2023: Bodhbarnü Gandhinagar nung linük Tir, Droupadi Murmu-i Gujarat Legislative Assembly nung jembidang tangokba noksa nung angur.

GOVERNMENT OF NAGALAND
DIRECTORATE OF HIGHER EDUCATION
 NAGALAND : KOHIMA
 NO.HED/EXGS/NGESSO/2018/934
 Kohima, dated the 13th September 2023.

Nagaland Government Ex-Gratia Scheme for Students Studying Outside Nagaland (NGESSO)

The Department of Higher Education, Nagaland is implementing the Nagaland Government Ex-Gratia Scheme for Students Studying Outside Nagaland (NGESSO) which provides an Ex-Gratia of ₹5 Lakh in the event of any unfortunate deaths of Indigenous Naga Students of Nagaland who are studying outside the State in different parts of the country. In order to avail this Scheme, students have to register themselves with the Directorate of Higher Education, Nagaland.

Registration Form (Fresh/Renewal) and necessary information will be available on the Directorate's Website <https://highereducation.nagaland.gov.in> from 18th September 2023.

Last date for receiving Registration Form: 30th November 2023.

Sd/-
(Dr. ANSHOGA)
 Director
 Higher Education
 Nagaland : Kohima

INDIA senden nung party tem tsüngda menden lemsatsü atema jembid

New Delhi, September 13 (Agencies): Bodhbarnü opposition teloktep INDIA indang mezüngbuba coordination committee senden nung züngsemtemi party tem tsüngda menden lemsaba maparen tenzüksü lemtetogo, ta Bodhbarnü Congress general secretary, KC Venugopal-i osangbenertem nem metetdaksü.

Osangbenertem senden nung jembidang Venugopal-i, "Coordination committee mezüngbuba senden tanü Sharad Pawar'er kidang amen aser iba senden nunggi party 12 nungi züngsemtem aden. TMC nungi Abhishek Banerjee bo iba senden nunggi medentet, kechiyong BJP indang mangyangba politics ajanga Enforcement Directorate-i pa (Abhishek) jaoka liasü. Coordination committee senden nung party tem tsüngda menden lemsatsü atema maparen tenzüksü telemtetba agiogo," ta metetdaksü.

Venugopal-i, INDIA nungi opposition lenirtemi TV show aser o entepba sentong kar

nungbo shilem magitsü atema 'list' ka renemtsü, ta metetdaksü. Paisa, "INDIA teloktep nung züngsem party temi maneni senden mena telemtetba agitsü. Committee-isa linük tesem balala nung lokti senden ayongzüka agitsü telemtetba agiogo. Mezüngbuba lokti sendenji October ita mezüngbuba hopta nung Bhopal (Madhya Pradesh) nung ayongzüka agitsü," ta metetdaksü.

INDIA Coordination Committee senden tembangba sülen PDP tongti aser taoba mapang Jammu & Kashmir chief minister, Mehbooba Mufti-i, "Bhopal nung onoki linük nung jenjang maneni atuba, mapa manguba tebilemstü aser BJP sorkar ochimashi metetdaksütsü," ta ashi.

Coordination committee nung züngsem 13 lir aser mezüngbuba senden nung adenertemji - NCP Tir Sharad Pawar, Congress lenir K C Venugopal, CPI nungi D Raja, Samajwadi Party nungi Jawed Ali Khan, DMK nungi T R

Baalu, RJD lenir Tejashwi Yadav, AAP MP Raghav Chadha, JD(U) lenir Sanjay Jha, NC lenir Omar Abdullah, PDP tongti lenir Mehbooba Mufti aser Shiv Sena (Uddhav Balasaheb Thackeray) lenir Sanjay Raut nung liasü.

Senden nunggi JMM lenir Hemant Soren aser TMC MP Abhishek Banerjee nabo medentet.

West Bengal nung school recruitment ochimashi ken o nung ED-i Abhishek Banerjee jaokba ajanga pa iba senden nung medentet, aser iba dak sendakba nung Shiv Sena lenir, Sanjay Raut-i, "Tanü pa (Abhishek) ED-i jaok. Onoki pa menden tazüng yutsütsü aser Central agencies-i INDIA züngsemtem reshikangshiba osang sangdongtsü," ta ashi.

Amongnü TMC lenir, Abhishek-ia, "ED-i agütsüba notice ajanga ni September 13 nü parnok matsüngdangi aotsüsa akümer, iba anogo ya Delhi nung Opposition teloktep INDIA coordination committee senden ayongzüka anogo lir," ta metetdakja liasü.

September 17 nü party ajak nungi floor lenirtem senden ayonger

New Delhi, Rongjui/ September 13 (Agencies): Sorkari ayongzüka Parliament temeja senden jelia September 17 nü sorkari party ajak nungi Parliament nung floor lenirtem senden ka ayongzüka osang Union Minister of Parliamentary Affairs, Pralhad Joshi-i metetdaksü.

Bodhbarnü Joshi-i X ajanga, "Party ajak nungi floor lenirtem senden ka September 17 nung 4:30 nung ayongzüker," ta metetdaksü.

Paisa, "Kasa tejaokba shidiji email ajanga lenirtem nem metetdaksüogo," ta ashi.

August 31 nü sorkari September 18 nungi September 22 tashi Parliament senden temeja ayongzüka osang metetdakja liasü, ajisüaka sorkari iba senden nunggi jembitsü onüktem memetetdaksüba agi opposition-i sorkar aitsür.

Bodhbarnü Trinamool Congress (TMC) MP, Derek O'Brien-i, tang tashi Parliament temeja senden nung jembitsü onüktem sorkari

memetetdaksür, ta ashi. Pai X ajanga, "Parliament temeja senden tenzüksü atema mapa inyakba anogo ana dang lir, ajisüaka tang tashi iba senden nung jembitsü onüktem memetetdaksür. Nisung anati dang meteta lir, saka asenoki asen linük ya parliamentary democracy ta jembir," ta metetdaksü.

Congress lenir, Jairam Ramesh-ia sorkar aija tamalen temeja senden ayongzüka mapang nung jelia metetdaksüba onüktem lemsatapa liasü.

Osang angazükba agi, Parliament temeja sendenji Parliament building tejenba nung tenzüksü aser tasüngnü Parliament building tasenbai belentsü.

Iba senden nunggi India nungja agi 'Bharat' melentsü atema sorkari benoktsüa akok. Tang linük temzüng ajanga asen linük dang "India, ibaji Bharat..." ta amshir, ajisüaka tongmelang agi 'Bharat' ta dang amshitsü atema aikati akhanger.

J&K nung Army colonel ka, major ka aser Dy. Superintendent khasat

New Delhi, September 13 (Agencies): Kashmir nung Anantnag district kübok Kokernag area nung kiralongrartem den khatepdang Army Colonel ka densema security force officers asem süogo, ta Bodhbarnü ketdangsertemi metetdaksü.

Mongolbar nikongdang

Gadole area nung kiralongrartem anema sepaitemi operation tenzüka liasü saka aonungbo thinen.

Bodhbarnep maneni parnoki kiralongrartem mita ao. Army colonel leniba nung sepaitemi kiralongrartem amak aser iba mapang nunggi kiralongrartemi pa dak injang khalokja pa kanga mejungi

yirua liasü.

Indian Army 19 Rashtriya Rifles nung commanding officer, Manpreet Singh den Major Ashish Dhonack aser Jammu & Kashmir deputy superintendent of police, Humayun Bhat nata injang agi yirua liasü. Par asemprong hospital-i anir oa yari saka meküzmükteti süogo.

Ken o mejembi tashi J&K nung rara manentsü: Farooq Abdullah

Jammu, September 13 (Agencies): Bodhbarnü taoba mapang Jammu & Kashmir Chief Minister, Farooq Abdullah-i, India aser Pakistan nati mangatetep ken o ajak bentetsü atema ken o mejembi tashi union territory nung rara alitsü, ta metetdaksü.

Osangbener den jembidang National Conference party lenir Abdullah-i, "Raraji maneni dang alitsü. Telungpur tebilemstü anenogo, ta jembibaji tai. Yasha raraogo aser tanü-a rarar. Linük anapronglai ken o jembia lenmang ka mebushi tashi item rara alitsü," ta ashi.

US nungi bener aruba süngjanglijang balala nung saru agienba dak sendakba nung tasüngdangba ka langzüdang Abdullah-i, ibaji ajanga yangi züsentetba süngjanglijang nung jenjang ajemtsüsa akümtsüa akok, ta ashi.

"Ibaji ajanga Jammu & Kashmir, Himachal Pradesh aser Uttarakhand nung aliba

süngjanglijang industry kongshia takoksa angutsüa akok. Aluyimertemi senotsü aika indokogo, ajisüaka parnoki züsentetba süngjanglijang jenjang ajemtsüra parnoki takoksa angutsü," ta pai ashi.

"Aluyimertem takoksa mengudaksütsü atema ni sorkar dang iba tebilemstü onük repringshitsü mepishir. Aluyimertemi takoksa ngura ibajii linük atema tajung masütsü," ta taoba mapang Union Minister, Abdullah-isa metetdaksü.

Opposition teloktep INDIA indang coordination committee senden dak sendakba nung tasüngdangba kabo pai langzütsü memelungi liasü.

"National Conference (NC) tenüng nung iba senden nunggi adentsü atema Omar Abdullah (par jabaso) yokogo. Iba senden tembangba sülen ang senden nunggi kechisa lemtetar nenok nem metetdaksütsü," ta pai metetdaksü.



September 13, 2023 nü Kolkata nung TMC MP, Abhishek Banerjee dang asüngdangyaba tesem- Salt Lake Enforcement Directorate office kima police nokdaka aliba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ RONGJUI 14, 2023

Train & Foothill Road

Asenok Mokokchung nung alirtem inüseta meintetba timtem tulutibaji Mokokchung o Dimapur na tsüngda senzüsenponggsü aser khu belentsü atema gari lenmanga mesadem aser majung , train lenmangbo maka aser tang tashi anünglen Mokokchung ajanga tayimtsü süira bangkaseta repranger. Atangji, Mokokchung district-a iba tia nungji ali nung, Kohima dak alakba tanga district-tem jenjangbo tejembila masütsü. Kohima-a gari lenmang tera ajungba dak alaka train aser tayimtsü agibo matonger. Aji oda, alima ka renloktsü atema tang asenok jajaba Mokokchung-Mariani aser Amguri-Mokokchung lenmang nung senzüba gari kisüng yagibo talangka moutettsü, meperitsü aser memeneptsü. Tang yabo anarongdena khu terara bener temang ajak raksar tadongtsü ka atonger, anungji süpo aa dang sürem shisa ama, asenok nungdak senzüba jenjang o gari aser temang raksaba aser mapang endokba jenjang na mesüteper. Iba jagi asenok rongnung aiben Tuli tashi danga nisung amenba aser khu abenba train atutsü aser tenem tsüng lenmang (Foothill Road) yanglutsü rongdak nungdakba indang jembir. Alima nung nisunger nungdak tatem maka aser tenük sünga mali, saka asenok asoshi Tuli tashi danga train atutsü aser tenemtsüng lenmang sademsadema lapoktsüba yabo kanga rongdak nungdakba ana asütsü. Item rongdak nungdakji reprangteta tan Nagaland tatar senden nung MLA Wb. Nüklutoshi-i Amguri nungi Tuli town tashi train atutsü nungdakba indang ken o süoka jembibaji ajak atema kanga nungdakba ken o ka jembio. Atangji, nüboritem asoshi bus aser taxi garitem nungdaker, anungji itemjibo train aser tayimtsü oli aruli ta senzüaka taliang nungdaktsü. Ajisüaka, bus aser taxi kisüng nung nüboritem jajaba agi tangar memeneptsü aser merenloktsü. Ajisüaka, kodang tayimtsü nungsa masüyonga, train nung Mokokchung mesüra Tuli nungi Dimapur ajanga Guwhati tashi danga nisung mener senzüba den külemi khua dena abentsüsa train jaja tenzükdir, idangjiang asen nüboritem telok telok train nung melamelaa bendangleni aotsü aser bendangertema arutsü. Aji dang masü, saka tang Assam ajanga süng aser long bener aotsü atema timtem aser takoksa ajurubatema mali akümtsü. Bilemdangdi süra, asen meyong süng, long aser alu nung züsentetba kechisarina asen lima nungi kecha tetsüdak melii Tuli aser Mokokchung nungi train nung aser gari nunga foothill road ajanga Dimapur alema yoktsüubaji asenok atema tasak masütsüla saka asenoki asenoksasa item mapa tilala anaji kanga tasak kümdaktsür. Aji oda, Guwhati, Dimapur aser Amguri nungi Tuli aser Mokokchung tashi train jajara, asen nisung aikati tanga mapa meinyakyonga Bihar aser Punjab ama nungi alo, beyas aser jangotsü bener arua wholesale nung asenok asoshi dang masü saka anüdoklen Myanmar nung alirtem asoshi dena ayok tenzüksü. Aji oda, bus nung bena business inyakba o train nung bena business inyakba na tagitsü aser tajangzük anguba nung tetsüngda tuluka lir. Tangar business yamaji inyaker aser yamaji inyakba agi pei takar akümba kisüngji masü saka nüboritem nungdak ajak pei kishizüng tashi bener aruja alima renlokdkaktsür. Iba atemaji asenok yimsüsür aser lokti lenirtemi jembipet jembia inyaktsüla aser nüboritemia parnok nungitsüla.Tuli tashi nisung amenba train matu anenbaji train nung senzür maliba ajanga liasü ta tang tatar senden nung kuli agütsür amenbaji masü, saka kechiba Tuli nungi train nung jajar mali asü (?) ta asüngdanga kuli bushitsüubajiang tongtibang liasü. Ajisüaka, asenoki asen nungdak Union minister-tem dang shia inyaktsü melen Railway nung inyakertemi kuli ka agütsüba nung dang metaloker yangji atemer. Tangbo, joko yamaji mesüi asenoki asen rongdak nungdak meteta kong shiba den jembitsülar jembitsüla. Atangji, tangbo Tuli leni atuba train station-ji Tuli-a matong arem nung lir. Iba jagi balaka nüboritem asoshi kanga mesadem akümer. Aji oda, nisungtemi arem nung train bushia aotsüba masü saka train-i nisung bushia yimtii arutsüla. Item nungdakji yimten yimsüsürtemi jembitettsüla. Asenok atemabo Nagaland nung yi ayoktsüla, mayoktsüla ta jembiba dang nungibo, train agi kodangang Mokokchung atongtsü aser Foothill Road ya kodangang renemtsü ta jembiba nung mapang endok tajungba asütsü.

OLEMSABANG

Khristan lima ta asüba tenüng ya koda jangratemtsüka

R. Nungshi Longkumer

(Maneni yashi adok nungi...)

Ano kaonung ni mokokchung nungi Dimapuri aluba mapang Night Bus nung onok tetsür-tebür Bus sünga mener liasü. 9:30 PM shi ka nung Mariani tonger Bus jagi Hotel ka bushia oa onok ajak iba hotel jagi tua amen. Ni tatsüka repranga ali nung nisung kati chi meshia sarasademer chiyongba nguko, saka tetsür tebür teimbaka kinüklen mener yi meshia yiji jemtepa kazürang chi meshia chiyongba angu. Iba mapang nungsa nibo kanga dang junga meteta aliba tamanger tajung ka ta repranga aliba paibo ni memetet asütsüa akok, paa chiyongba mapang hotel nung inyakertem jagi pa nem chiyongtsü abensa bener marutsüba agi nokdaker tashi agi asalokja kü nem dangsa dang mersü bener arujang ta merenshia angu. Khristan lima nungi arurtem Mokokchung, Mon, Tuensang, Zunheboto aser jila balala nungi arur Khristan temi pi lima nung yamajisa senzüra na ta akseta reprangogo. Mariani nung alir Assam nung jagibo kü dangbo kecha mashiako saka Khristan lima nungi arur Khristantem achi ajemba, senzü senpongba, jembishinüba angudang tzümartemi menüja repranger amai nibo reprangtetogo.

Temeshi Lai Yohan 15:8-12 nung, Yisui ashiba ama nenoki ni sayuba ama inyaka sayudang Kü bu sentsüwangshir, Yamaji asen mapa tajung angudang asen Tsüngrem pelara iba temoatsüji asen agitsü masü no, saka asen mapa ajanga asen Tsüngrem mepelara asensa temoatsü mangutsü atu!

Ochi mashi kulak-kupong aser mapa tamajungtem asenok rongnung ano kara lir asu? Tuluba renloka maodang memelenshira tarütsü lanu putu nungbo Khristan lima ta asüba tenüng ya samaa odisü ta tsürensetta bilemetsür. Nisung tenüngbo 'Tajungla' saka nisungbo tamajung ta sura Pi tangari tenüng O nisung na meputep, Khristan lima ta asüba tenüngji onsara ajung, saka yangji alir nisungji tamajung ta ashitsü. Anungji arungma, Naga lima yimtiba nung alir lenirtemi anir yimtsüngtem nung alir yimsüsertem, ano lokti balala nung alir lenirtem, office balala nung inyakertem ano nisungtem rongnung tashi mangartem atokdang parnokji pua merenshia azüoktsü police tem, parnok ajaki nubür meima tematiba Tsüngrem akum tsüba iba Naga lima Khristan lima ta asüba ya ano tali tajungba küma yanglutet nungbo koda temoatsüba süla ta aginua bilemba olem kar lemsateper.

We're Rolling On The Wheels of Time

1960's mapang lanuwa Mokokchung Govt, High School nung azüngba mapang "We're Rolling On The Wheels of Time" iba ken ya Gari nung lanur telok senzüdang, town nung senzüdang aser Hostel nung alidang kanga longsolongbena tena senzüli asü. Iba kenji tanga kü ka nung yua aliba agi kanga menungraa ait nung iba mapang Mokokchung nung azüngertem tang alirtem aser lanurtemi iba ken ya bilemteta aser menungraa atentsü tayongzükba nung tonic solfa nung yanglur Tir Yimyim paper nung adoktsür. Tangbo iba ken Ao o nunga meyipzuka tonic solfa nung yanglua lir saka mezüng tenshiba English nungjiang tajungba aser temenungratsüka asüba agi adoktsür.

By : Y. Imti Tzüdir, Dimapur.

ROLLING ON THE WHEELS OF TIME

ːs, |d .d :d .d |d :r |m :- | - :m .f |s :s |m :d |r :- | - :
 :m, |m, .m, :m, .m, |m, :f, |s, .l, :d, .l, |s, :s, .s, |d :s |d :t, |s, :s, .fe, |s, :
 1. We're rol- ling on the wheels of time (wheels of time) As the days go passing by (passing by)
 2. We've rolled a- long ac- ross the years (all the years)With so ma- ny ups and downs (ups and downs)
 3. Oh let us trust the Lord each day (Lord each day),To di- rect us al- ways right (always right)
 4. The mile post on the earth- ly road (earthly road), We are passing one by one (one by one)

ːd |s, .s, :s, .s, |l, :s, |d :d :d :d :d :d :d :r |m :m |s |d :t, |t, :d |t, :
 :d |d .d :d .d |d :d |d .m, :m, .s, |d :d .d |d :d |d :l, |s, :l, .l, |s, :
 s, |d .d :d .d |d :r |m :- | - :m .f |s :s |m :r |d :- | - :
 m, |m, .m, :m, .m, |m, :f, |s, .l, :d .l, |s, :s, .s, |d :d |d :t, |s, :s, .fe |s, :
 And soon we'll leave this earthly elime (earthly elime) For the homeland in the sky (in the sky)
 We've had our heartaches and our cheers (and our cheers), And our days with smile and frown (smile and frow)
 That we may ne- ver go as- tray (go as- tray), In the paths of sin and right (sin and right)
 And soon we'll reach the soul's a- bode (soul's a- bode), When the flee- ting race is run (race is run).

t, |d .s, :s, .s, |l, :l, |d :d .d |d :d :r |m :m |s :f |m :m .re |m :
 s, |d .d :d .d |d :d |d :m, .s |d :d .d |d :d |s, :s, |d, :- | - :
 CHORUS:
 d |m :m :- |m .r :d .r |m :s |s :m |s .s :- |s .s :m :- :f |s :m |r :-
 s, |d :d :- |d .t, :l, :- :t, |d :d |d :s, |d .s :- |d .d :d :- :t, |d :d |t, :-
 We're rolling, rolling on the wheels of time, We're rolling, rolling on the wheels of time,
 m |s :s :- |s .f :m :- :s |s :m |m :d |m .m :s .m |s .s :- :s |s :s :-
 d |d :d :l, .s, |m, .s, :l, :- :s, |d .l, :s, |d :d |d .d :m, d, |m, d :d :- :r |m :d |s, :-
 Rolling rolling

.d |m m :- |m .r :d .r |m :s |s :l |s .s :- |s .s |s :- :f |m :r |d :- | - :
 .s, |d .d :- |d .t, :l, :- :t, |d :s |d :d |d .d :d .d |d .d |d :- :r |d :t, |d :- | - :
 We're going, going to that land sub-lime, we're rolling, rolling on the wheels of time.
 m |s .s :- |s .f :m :- :s |s :m |m :m |m .m :s .m |s .m |s :- :l |s :f |m :- | - :
 d |d .d :l, .s, |m, .s, :l, :- :s, |d .l, :s, |d :d |d .d :m, d |m, d |m, :- :f, |s, :s, |d, :- | - :
 going, rolling

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogotemi Morocco nung menoknok lendong agi kongshirtem yarir



Morocco nung menoknok lendong nungi jenburtem relief camp nung jenoka aliba noksa nung angur.

Yaounde (Cameroon), September 13 (Agencies): Morocco linük nung menoknok lendong nung nisung 3,000 jungnüa sür nüburtem timtemba mapang nung alima tesem balala nungi Arogotemi iba linük oa yaritepdar.

Tang Morocco nung rescue teams-i kiojen chirepba jana-ona tua tasümgangtem mesüra taküm alirtem bushir. Hokolbar aonung menoknok 6.8-magnitude nung anakba lendong nungjisa nisung 300 jungnüa yiruogo. Menoknok anakba tiyongtsüji Marrakech liasü.

Amongnü Pope Francis-i menoknok lendong nung takoksa angurtem atema sarasademtsüba den külemi tejashi lemsatöp.

"Iba lendong nung asürtem aser yirua alirtem atema ni

sarasademtsür. Onoki Morocco nunger den nokdaker," ta Pope-i metetdaksü.

Morocco nung Arogo indang Caritas Rabat-i kümzükba maren inyakdar aser timtemertem yaritsü atema Amizmiz nung center ka amenoktsü.

Catholic Arogo indang Caritas International-ia iba lendong nung takoksa angurtem nem teyari agütsütsü, ta metetdaksüogo.

Caritas internationalis aser Italy nung Arogoi menoknok lendong agi kongshirtem yaritsü atema Euro sen 30,000 lemsütsüogo.

September 10 nü Caritas Internationalis-i sangdong ka ajanga, "Onoki Caritas Morocco, Caritas Middle East aser alima tesem balala nung

Caritas zümgsemtem den tongtepratepa inyakdar. Onoki longjemer takoksa asadangtsü aser tarutsü anogotem nung amalitepa yaritsü," ta metetdaksü.

Morocco ya Muslim nunger nütsümg teimba aliba linük ka lir. Iba linük nung Khristan 24,000 shi dang lir aser ibaji linük nütsümg shilem 1 dang nungi tajemba lir.

Catholic Relief Services, U.S. bishops' conference-ia sangdong ka ajanga parnokia Caritas-i teyari agütsüba maparen nung yaritepdar, ta metetdaksü.

CRS-i sangdong ka ajanga, "Tang ama lendong atalokba mapang aser lendong atalokba sülen mezümg teyari agütsürji Arogo aser Caritas lir," ta metetdaksü.

Myanmar nung jenshia aliba tanurtem yaritsü Arogoi mepishir

September 13, 2023: Tang rara aliba Myanmar linük nung Arogoi maneni tesem balala nung jenshia aliba tanurtem nem chiyungtsü aser shisaliok agütsütsü, ta metetdaksüba den külemi item ama tanurtem yaritsü ayongzükogo.

Myanmar kübok Mawlamyine nung tongti putir, Maurice Nyunt Wai-i, par Arogoi maneni tanurtem nem chiyungtsü aser shisaliok agütsü, ta metetdaksü.

St. Mary of Assumption Arogoi tanur 700 dak tema jenokdakja yaridar. Ano tanga Arogo 14 nunga tanur noklang aika yaria repringdar.

Wai-i, "Item tanurtem ya linük telung nung tesem balala nung jenshia kibongtem nungi lir. Ozü Arogo nungia nisung meyirjang aika jenshiogo," ta metetdaksü.

Myanmar kübok state balala nung sepaitem aser Popular Defense Forces (PDF) na tsümgda rara ajanga Khristantem teimba ser kibong aika jenshiogo, ta pai ashi.

Sepaitem aser lisopur telok tsümgda raraba ajanga kibong noklang aika aremi jena aotsüsa aküm; arem nung

parnok kanga timtema lidar, ta pai ashi.

"Anogo shia taküm alitsüji kanga tasak. Tanurtem teimbaka school-a maoyer," ta pai ashi.

Pei ki toktsür jenshirtemi teyari meshiba sülen putirtem aser Arogo nung temelungertem longjemer teyari balala agütsür. Arogotemi tanurtem nem school shisaliok agütsüba den külemi nungdakba teyari balala agütsüdar.

Tongti putir, Mai-i, nütsümg million 2.7 aliba region nung Khristan 15,000 shi dang lir, anungji Arogoi bilemba ama meyariteter, ta ashi.

Paisa, "Arogoi maneni teyari agütsüba den parnok melung süneptsütsü aser teimla agütsütsü, ajisüaka item ajakji ola madoki mimshia dang inyaker," ta ashi.

Sepaitemi Tenla kitem aser Arogoi lapokba rejutem-a amakba agi Tenla kidang jenoka alirtem-a jenshiogo, aser Tenla kitem nung tekülem sentong magir.

"Rara manenba agi nüburtem kanga ani-belemogo, jashir aser teimla makai kümogo. Ajisüaka

tamangertemi pei tamang indang küli agütsür aser maneni sarasademer," ta pai ashi.

Thailand nung amenoka aliba Institute for Strategy & Policy-i ashiba agi, taküm January ita nungi June ita tashi nung linük telung nung nisung 680,000 jenshiogo.

2021 küm sepaitemi tashiyim amshia democracy sorkar atsümgdokba sülen nungi tenzüka linük telung nung nisung million 2.6 dak tema tesem balala nung jenshia lir.

Taoba ita UN Under-Secretary-General for Humanitarian Affairs & Emergency Relief Coordinator, Martin Griffiths-i anogo asemnü Myanmar semdanga liasü. Iba mapang nungji pai Myanmar nunger million 18 yaritsü atema maneni teyari agüjjang, ta ayongzükba liasü.

"Iba linük nungji maneni raraba agi nütsümg shilem asemnü nungi shilam katibo teyari balala nungdaka lir," ta shia Griffiths-i Myanmar nung yimtenren lenirtem aser alima nung lenirtem dang maneni Myanmar nung teyari nungdakkapurtem yaritsü ayongzük.

ANOGO ABEN TSÜNGREM DEN

Tain akümstsü asoshi inyakyim ka T.Ken 131:1-3

Kenü anogo Dawid chuba ki ajanga oya liasü, aser Pai tanur ka ajepba angashi. Kechi asü? Parnok yimsü ama tanurji mama atokba mapang liasü. Tetsü-i ashi, "Tang, kü chir, na tain kümdaki, aser tang mama atoktsü mapang lir". Tanuri ashir, "Nai ni meimer; nai ni sempar". Dawid pa mendeni ao aser iba ken 131 ya zülu.

Ajak den tebilemstsü, asenok meindang tain kümadoker-asenoki mama toktsütsü tenümgdaksü. Na asoshi Tsüngremer nükjidongji na tashi (mature) Kümdaksütsüba lir. Asenoki tongtipang ta bilemba toktsütsüba Tsüngrem inyakyim lir.

Nai tanur ka dang tetsü dak dang metaloker taküm tepiyong malitsüla ta koda angatetdaksütsü? Meimba agi asü? Au!saka pa aintsüla, nisung ka akümstsüla anungji ibaji asenok dena lir. Tsüngremi asenok nem tajungtiba agütsüner, aser pai aginüba asenoki Pa nem bendanga agütsütsüla. Pai T.ken 131 nung tanur tetsü nungi aienbaji tesama masü, Pai tajangzük angu. Pa taküm tuluba dangi adok. Yamaji Tsüngremi asenok akabatem asenok nungi agienbaji itemji majungba agi masü saka item jaki asenok tajungtiba nungi sotter.

Tsüngremi na sot nung nai ajeper, ya bilemtetang : Pai na soter. Pai ashir, "Ni anasai arung tainba taküm (mature) nung adokdang aser asenok külemi odi".

Tsüngremi Pa chirtem tain tamanger kümdaksüner aser Yisu mesük lidaksüner. Kodang Pai na ne taküm langka nungi piladaksüner tashi angaba tanur ka kümang. Pai na renemdakjang aser Pai na asoshi kechi renemja kar iba asoshiji terenlok kaa liang.

GCN-i 2030 küm tashi nung Kibubai tenyaba wadang renemtsü meranger

September 13, 2023: 2030 metetdaksü.

küm tashi nungbo Khrista osangtajung ajanga alima nung alir ajak ayimjemtsü nükjidong nung Global Church Network-i inyaker.

European ministry lenirtem aser pastor temi FINISH 2030 campaign kübok Khristai tenyaba wadang atemtsü nükjidong yur inyaker.

Global Church Network indang FINISH 2030 campaign kübok 2030 küm tashi nung alima nung alir ajak den Khrista osangtajung lemsateptsü nükjidong yur inyaker; 2030 küm ya Arogo tentetba sülen küm 2,000 ajungba küm lir.

Global Church Network (GCN) tentetsang aser Tir, Dr. James O. Davis-i, "Mangdang kaji mapang atemzükba yura nükjidong akümer. Kibubai tenyaba wadang tang tashi merenemtetba kulitem rongnung kaji- asenoki mapang atemzükba mayuba agi lir," ta

metetdaksü.

FINISH 2030 ya item olong nungi agitet- Find, Intercede, Network, Invest, Send aser Harvest.

Church of God nung General Overseer, Dr. Timothy Hill-i, "Asenok ya putiotsü nung kanga tongtibang mapang ka nung alir, aser asenok taküm lia Kibubai tenyaba wadang ya renemtettsü. Iba mapang ya tenyaba wadang nung lenirtem akümstsü mapang ka lir," ta ashi.

GCN-i alima tesem balala nung Arogo 700,000 den partnership yangluogo aser FINISH 2030 senden balala nung lenirtemi küm 9 tsümgda pastor 110,000 nem training agütsütsü nükjidong atemzükba yur inyaker.

Tang GCN indang Global Hubs of Christianity 159 lir aser ano maneni sangküm Hubs tase 39 Europe nung tenzütsü.

AO OSHI ANGAZÜKDAK: TANÜ ANGAZÜKTSÜBA OJANG



Saktsü

- (v) tepok nung aliba chiyongtsü tebangleni meyipa adoka endok (vomit)
* Nisung karbo gari nung kanga saktsür.

Saktsünütsü

- (n) tepok nung aliba chiyongtsü tebangleni adoknüa aitba (feel vomiting)
* Chiyongtsü meshitak chisemba agi saktsünütsü atur.

OLONG PAITEP # 6636

1		2		3		4		5
						6		
7								
						8		
						9	10	11
			12					
	13							
14						15		
16								
			17					

TIPLIN

2. Yimsüsübaren - (6)
6. Lenmang aika - (4)
7. Rong tulu - (5)
8. Tarutsü atema tetzü - (4)
13. Keta-asen - (4)
15. Pei tasoyim - (5)
16. Kongro - (4)
17. Jaksa-jaklem - (6)

LANGTSÜNGLEN

1. Temerang - (6)
2. Yisu nüngja ka - (6)
3. Tama - (6)
4. Mamatzü agütsüba shiruru - (5)
5. A ___ üm - (3)
9. Küm tarensen - (6)
10. Tzü yimti - (6)
11. Tamang - (6)
12. Ajak dak atongba wara - (5)
14. A ___ ata - (3)

OLONG PAITEP # 6635 TELANGZÜBA

TIPLIN:

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN:

1. Tenükjang, 2. Luden,
3. Kiochtsü, 5. Lenti, 7. Tajangzük,
11. Teronem, 12. Sempa,
13. Jahaz.

NAI-A YA METETTER MA



Russia nunger agi America senso akümsang Vladimir Kosma Zworykin-i 1923 aser 1924 küm osangtsüsang agitepba (transmission) atema tube (iconoscope) aser receiver (kinescope) naprong yanglutet.

HAPPY BIRTHDAY

Tenüng : Wangshiren Jamir

Küm : 1 Year

Talidak : Akhoya

Tanü Tsüngremi semchir Wangshiba taküm küm ka ajungtsü tashi arishi moatsü nung Tsüngrem tenüng asanger. Ano tarutsü nunga Tsüngremi semchir taküm arishi moajangma ta ozü sarasadem.

Temeim Otsü aser Onü Aien (Dimapur)



OFFICE OF THE ELECTRICAL WARD YOUTH UNION CHANGTONGYA TOWN

Khonang Tetushi Agütsür

Ozü Changtongya Town Electrical Ward nungi lanur anati tawa tatidang balala nung takok tulu nua sorkar mapa tajung ngutetba asoshi tena nem tenüngsang aser tetushi agütsür.

1. NSSB tatidang nung Wb. Shiluyanger & Wt. Lanurenla jabaso **Sp. Rongsenakum Lkr** ajanga Commissioner Office nung LDA-cum- Computer Assistant mapa ngutet.
2. NPSC tatidang nung Wb. Imnasukup & Wt. Bendanginla jabaso **Sp. Takusangba** ajanga Department of Art and Culture nung Assistant Research Officer mapa ngutet.

Tsüngremi maneni nena wadang nung moajangma.

Sd/-
Sungjemrenla
General Secretary

Sd/-
Nokintemsu
President



Hornbill Finance Limited

(RBI Regn.No.B.08.00167 Dated 7.11.03)

CIN: U65929NL2002PLC006840

Regd. H.Q. Grace Mansion, Tajen Ao Road, Dimapur - 797 112; Nagaland
Email: hfl.ngl@gmail.com

PUBLIC NOTICE

Hornbill Finance Limited

Regd. Off.: Grace Mansion, Circular road, Dimapur, Nagaland- 797112

CIN: U65929NL2002PLC006840

Email: hfl.ngl@gmail.com

Joint Public Notice

PUBLIC NOTICE is hereby given that the shareholders of Hornbill Finance Limited, a company incorporated under the companies Act, 1956 and Registered with Reserve Bank of India vide Certificate Number B.08.00167 dated 07.11.2003 as a Non-Deposit taking Non-Banking Finance Company, with its Registered office situated at Grace Mansion, Circular Road, Dimapur, Nagaland- 797112, are intended to transfer the ownership and control of the company through the sale of shares to (1) T V Gopinath (2) K K Vijayakumar (3) Rajeevu M A (4) Dr Indira K R and (5) Tiatemjen K Jamir (collectively referred to as 'Acquirers'). The new management / shareholders seek to acquire 98% of shares from existing shareholders.

The new directors to be appointed are (i) Shri T V Gopinath, #446, Vishwamanava Double Road, Kuvempunagar, Mysore 570023, (ii) Shri K K Vijayakumar, Kompara, Anickad West PO, Kottayam-686503 and (iii) Shri Rajeevu M A, Manakkunathu House Paduva PO, Mattakkara, Kottayam 686564, and the resigning directors are (1) Chuba Pongen, H/no 009, Grace Mansion, Circular Road, War-09, Supply Colony Dimapur Sad, Dimapur, Nagaland - 797112 (2) Yongya Chingmak, H/No 1053, Block-1, NH-29, Near Woodstock School, Padampukuri Village, Padampukhuri, Dimapur, Nagaland - 797116 and (3) Tiatemjen Kezevilhou Jamir, H/no- 247, Block - 3, Chekiye Village, Chekiye, Dimapur, Nagaland - 797115. The proposed transaction will help the company to expand its business operation in other states too. The company can leverage the expertise of the new management in achieving the desired goals.

The above Notice is being given pursuant to RBI Circular NBR, (PD) CC, No.065/03.10.001/2015-16 dated 9 July, 2015 and subsequent relevant Regulations. The RBI vide letter No. GWH.DOS.ADM.No.S151/01-09-167/2023-24 dated 8 September 2023 has provided their 'no objection' to the Company for aforesaid change in its control and management.

In case of any objection in respect of the above-mentioned sale / transfer of control / management, the same may be communicated in writing stating therein the nature of interest and grounds of objection within 30 days from the date of publication of this notice to Hornbill Finance Limited at its registered address with a copy to aforementioned new shareholders at their respective address or to the above mentioned Email ID. This Public Notice is being issued jointly by the Company and the above-mentioned Acquirers.

Place: Dimapur

Date : September 14, 2023.



For HORNBILL FINANCE LTD

[Signature]
CMD
Authorized Signatory
For Hornbill Finance Limited

Assam CM kinungtsüi Rs 10 crore subsidy angu: Congress

Guwahati, September 13, 2023 (Agencies): Assam Chief Minister Himanta Biswa Sarma kinungtsü'er company-i Rs 10 crore subsidy angu aser iba ya BJP indang 'na khaunga, na khane dunga model' lir ta Congress-i Bodbarnü metetdaksü.

"Alu alizükang aser ibaji industrial ali kümdakjang aser iba sülen Centre sorkar nungi Rs 10 crore subsidy meshia agiang" ta Congress spokesperson Gourav Vallabh-i ashi.

Iba scheme ya BJP Chief Minister tem aser parnok kinungertem atema dang lir ta pai ashi.

"Pride East Entertainments Pvt. Ltd. ya regional media house ka lir aser north-east region ajunga sendakteper. Iba

company nung CMD ji Assam Chief Minister kinungtsü Riniki Bhuyan Sarma lir aser iba company-i Modi'er sorkar nungi Rs 10 crore nguogo. Iba ya PM Kisan Sampada Yojana kübok anguba liasü" ta Vallabh-isa ashi.

"Iba company-i alu ka alizük aser mapang tatsüka tsüngda industrial land agi melen aser Kisan Sampada Yojana kübok Rs 10 crore angu" ta paisa ashi.

"Report aser documents nung Riniki Bhuyan Sarma-i Darigaji village, Nagaon nung Agricultural Land 50 Bigha alizükba lir. Iba ali ya agricultural land ya mezüngbo liasü saka mapang tatsüka tsüngda industrial land agi melen. Iba sülen Pride East Entertainments Pvt. Ltd ajanga Ministry of

Food Processing, Government of India nungi government grant meshi aser Rs 10 crore angu" ta Vallabh-isa metetdaksü.

Congress MP Gaurav Gogoi-i platform X nung "PM Modi-i aluyimertem anasü agi tarulen teimba kümdaktsütsü atema Kisan Sampada scheme tenzüktsü. Saka Assam Chief Minister Himanta Biswa-i pa tashi amshia par kinungtsüer company nem Rs 10 crore credit linked subsidy ama ngudaktsü" ta metetdaksüba sülen Gourav Vallabh-i iba ya ashi.

Külen, Assam Chief Minister-ibo pa kinungtsü Riniki Bhuyan Sharma dak tai tongloksüba magizüker aser ali alitsü atema Centre nungi subsidy kecha mangu ta ashir.

Nawaz Sharif Oct. 21 nü Pakistan-i meyipa arutsü: Shehbaz Sharif

Islamabad, Rongjui/September 13 (Agencies): Taoba Pakistan Ato Kilonser Shehbaz Sharif-i Mongolbarnü sangdong ka ajanga ashiba agi, pa teti aser PML(N) tekolakba Nawaz Sharif Pakistan-i meyipa arutsü aser par party pur taruba election atema nüboyimba sentong pa lenisüba nung agitsü.

"Nawaz Sharif October 21 nü Pakistan tonga arutsü," ta Shehbaz-i, Pakistan Muslim League lenirtem pa teti-i London nung ayongzüka senden ka amenba nung shilem agiba sülen Pakistani TV station ka dang ashi.

Shehbaz-i ashiba agi, pa teti Lahore-i arutsü aser pa tsüngtonga oa tayimtsü anendak nungi teti agizüksü. "Nawaz Sharif meyipa arutsü atema linük ajunga atatepdar. 2017 küm Nawaz Sharif-i Pakistan toktsüba mapang linük aser rongsenketzüng koda renlokyonga oya liasü yamaji

maneni renlokyonga aotsü," ta Shehbaz-i ashi. Sharif meyipa arutsüba anogo ya PML-N otongdar Marriyum Aurangzeb-i X sabang ajanga lemsatepogo. "Taoba Ato Kilonser aser Pakistan Muslim League tir N Shehbaz Sharif-i, Muhammad Nawaz Sharif October 21 nü kidangi meyipa arutsü ta metetdaksüogo," ta lai zülutsü. "Nawaz Sharif ya kidangi meyipa aruba sülen kanga mera keta agizüksü," ta Aurangzeb-isa shisem.

Taoba July ita Shehbaz-i ashiba agi, taruba election nung PML-N-i takok ngutetra Nawaz ya PM atema party candidate asütsü. "Panama Papers" ken o dak sendakba nung Pakistan Supreme Court-i 2017 küm Nawaz ya taküm tepeyong public office kecha mabentsü atema tenokdangba agüja liasü. Ochi mashi inyakyim atema pa küm tenet tepuokdak

ayutsü atema obendang agütsür aliba dak sendakba nung pa bail nung chiochtsü atema Islamabad high court-i temelaba agütsüba sülen pa 2019 küm November 19 nü London-i ao.

HC-i, medical grounds nung ajemdaker pa nem hopta ti atema bail agütsü ajisüaka pa küm pezü shi London nung lidar.

Election Act dak sendakba nung parliament-i bangzüng kar agizüka parliamentarian tem mapang kobika disqualify sütsütsü iba dak sendakba nung ozüng meleshiba sülen pa meyipa arutsü atema lenmang lapoktsüogo.

June 17 nü Upper House-i agizükba bangzüng nung ashiba agi, nisung ka nem tenokdangba agütsüba mapang mejeta shia melira provincial mesüra central legislature nungi disqualify sütsüba nisung ka nem küm pongu dak tali tenokdangba magütsütsü.

Russia-North Korea tesendaktep akangshi: Putin

Vladivostok, Rongjui/Sept. 13 (Agencies): Region nung tesunep aser yimchiyimjung tenüng nung Moscow aser Pyongyang tsüngta kidanger tajung ama tesendaktep akangshitsü meranger, ta Russia Tir Vladimir Putin-i North Korea lenir Kim Jong Un nem tetushi agüja chiyongba sentong ka ayongzüka nung ashi.

"Asen tesendaktep ya Korea nüchiso bushiba mapang 1945 küm amenok, aser iba mapang Soviet aser Korean sepaitem lungjemer Japan mitkartem madak takok angu. Tanüa region nung tesunep aser yimchiyimjung tenüng nung kidanger tajung ama aser nükjidong kasa nung tesendaktep akangshitsü meranger," ta Putin-i ashi.

2019 küm Kim-i Vladivostok semdangba mapang linük ana tsüngta tesendaktep renlokshitsü asoshi pei tangatetba lemsatepa liasü. Aser tang semdangba ya tembar tajung ama aruba lir, ta pai ashi.

"Nükjidong aser sentong tulu yur Vostochny Spaceport semdangba kisüng masü saka Russia indang Far East nung danga high-tech clusters, industrial enterprises aser innovation center tem semdangtsü," ta Putin-i ashi.

Taküm Russia aser Democratic People's Republic of Korea (DPRK) benjongmung tongtipang ka amunger aser ibaji küm 75 tashi tesendaktep tajung aliba indang lir, ta pai ashi. "Democratic People's

Republic of Korea ta sangdongba Soviet Union-i mezüng agizüka liasü," ta pai nenshia ashi. Kim indang jembidang, Democratic People's Republic of Korea kumteter Kim Il Sung aser pa melener Kim Jong Il nati lateta yutsüba nung Kim tasü ita nokdaka lir, ta Putin-i ashi.

"Linük ana tsüngta tesendaktep tajung yangerba nung parnoki temolung agüja inyak aser yaritep aser tembar chichibaji lir," ta Putin-i ashi.

Russia Tir Vladimir Putin-i North Korea lenir Kim Jong Un den temolung ajak rakpoka jembishinü kaoko, ta ashi.

"Jembishinü kanga junga tenzüko. Region nung tensa aser linük ana tsüngta tesendaktep atema temolung rakpoka lemsatepogo," ta

Putin-i ashi. Kasa mapang COVID-19 pandemic ajanga Moscow aser Beijing takoksa tulu liasü aser DPRK arütsü ajungalen shibang, ta pai ashi.

Tang Russia aser DPRK tejangraba kasa kar lir, ta Putin-i ashi. "Tatishitsü agi, transportation aser logistics amala temolungi arur, tetetzü railway aser automobile lenmangtem, rongnendak tesemtem tanaben lapoktsü aser yangji logistics triangle kanga tajung adoktsü, railroad, seaport aser China-i aoba highway ka. Transportation tuluba akumtsü lenmag lir, aser ibaji kanga tongtipang lir," ta Putin-i ashi.

Pai Kim Jong Un den aluyimba tsütsü terenlok atema jembia liasü aser yangji Russia-i yaritsü lenmang aika lir, ta ashi.

Menungra Bilemteter



14.9.2016 - 2023

Onoki teti tang meima aliba asür **Mrs. Areninla Ozüküm** (Mongsenyimti), tanü anogo ya na onok nungi pilar küm 7 abensar, saka iba lima nung meliaka nai inyakba temeim mapatem bilemteta tanü onoki na menungra sarasadema amonger.

Temeim Kinungbu, Chirnurtem, Semchirtem aser Kinungertem.

MOLUNGNEN O

Onok asoshi temeimtila asür **Mrs. Chubaangla Kichu** (Khensa) iba alima toktsür September 6, 2023 anogo nung onok molung züreba tejashi mangyim nung toktsür, kibuba dangi meshilang yim-i ogo.

Onok mangyim mapang kija-kibong, kiyongertem, tembartem, telok balala aser temolung aria belemer temi nungdakba rongsen, nübo aser tamang sarasadem agi nungita yariba ajanga mapa tem ajak takok nung tembangogo.

Item ajak asoshi kanga pelaba lemsatepba den nenok ajak tematiba Tsüngremi meyipa moajang ta ozü sarasadem.

Temeimba Chirnur, Semchir-semnur aser Kinungertem.



Asür Chubaangla Kichu (28/02/1956- 06/09/2023)

OFFICE OF THE CHANGTONGYA SENSO TELUNGJEM DIMAPUR : NAGALAND

Ref no. CSTD/Gen/2023. Date : 13th June, 2023

Wadang balala nung sensosanger nem konang nüngsang bener arutsüba asoshi Changtongya Senso Telungjem Dimapur, Dimapur Changtongya Tsür Telungjem aser Changtongya Kaketshir Telungjem Dimapur ajanga item nisungtem nem tetushi agütsür:

1. **Smti. Akumla Chuba**, W/o Shri. P. Sentongmeren IPS (Rtd), lai Indian Administrative Service (IAS) jenjang ngutetba.

NPSC 2022 - 2023

2. **Shri. Takusangba**
S/o. Mr. Imnasukep Longkumer, & Mrs. Bendanginla, Assistant Research Officer, Art & Culture Department.



NPSC 2022 - 2023

3. **Smti. Nungshienla**
D/o. Lt. C. Olem Longkumer & Mrs. Anungla Jamir Junior Divisional Accountant Treasuries & Accounts, Department.



Nenok ajak anema yuja tarutsü nunga takokba lidakjang ta sarasademtsür.

Sd/-
President.
CSTD

Sd/-
President.
DCTT

Sd/-
President.
CKTD

TENÜNGSANG AGÜTSÜR

Wt. Asangla lmti-i Indian Administrative Service jenjang ngutetba atema Khensatsür Telongjem ajanga khonang tetushi tulu agüja pelaba lemsateper.

Khensa Women Ministry ajanga ayongzüka Khensatsür Shisatokden mezüngbuba senden 2015 nung akadang sensosanger nungi IAS adokdakjang ta sarasademtsü lemtetba ama tanü asangsang nung atalokja, asen lenir ajanga takok tulu ngua khonang nüngsang bener arutsüba asoshi pelar aser Tulusang Tsüngrem tenüng asanger.

Tarutsü nung ne sempet tajung ajanga lokti tejakleni anitsü Tsüngremi maneni ne taküm aser wadang moajangma.

Sd/-
Bendangrenla
Convener
Khensatsür Telongjem

Sd/-
Opangmenla
Associate Pastor, Women
Khensa Baptist Church



Office of the Watsü Unit Unger

B.P.O Unger
P.O: Chuchuyimlang 798614
Mokokchung, Nagaland

TENÜNGSANG AGÜTSÜR

Kr. Rongsenkala Jamir, Wb. Imnayanger Jamir aser Wt. Achila lmsong, tena jala-i 2023 küm NPSC tatidang nung Secretariat Assistant under Personnel and Administration Reforms Dept. nung ajangzüktetba asoshi Unger Watsü Unit ajanga konang tetushi tenüngsang tulu agütsür.

Tarutsü nung ne sempet tajung ajanga asen lokti tejakleni anitsü asoshi Tsüngremi maneni ne taküm aser wadang moajangma.

Sd/-
Masainla
President

Sd/-
Limanungla
Gen. Secy

Asian Games: Odisha CM-i state nungi asayartem nem teyari agütsütsü nangzük



Rongjui/September 13, 2023 (Agencies): Hangzhou Asian Games masaya tsungda Odisha Chief Minister Naveen Patnaik-i Bodhbarnü sangdong ka ajanga, state nungi iba asayamung nung shilem agitsü aliba asayartem nem senotsü teyari agütsütsü ta shiogo.

Asian Games nung shilem agitsü aliba asayartem parnok training, terenemshiba aser shilem agitsü aliba atema teyari

agütsütsü asoshi sen lakh 10 (asayar ajak) agütsütsü, ta chief minister office sangdong ka ajanga metetdaksü.

Asian Games nung ya continent nungi asayar tajungtibatem adenshia asayar aser iba asayamung ajanga asayartem sempet sayatsü asoshi sabang lapoktsür.

China nung asayatsü aliba Hangzhou 2022 Asian Games ya September 23 nungi October 8

nü tashi asayatsü.

Odisha nungi asayar 13 Asian games nung asayatsü. Asayartem rongnung Kishore Jena, athletics; Anshika Bharati, Ritu Kaudi aser Sonali Swain, rowing; Anupama Swain, Ju-Jitsu; Neha Devi Leichondam, Kayaking aser Canoeing; Pyari Xaxa, football; Deep Grace Ekka aser Amit Rohidas, hockey aser Dumuni Marndi, Tarulata Naik, Mama Naik aser Hupi Majhi, rugby nung densema lir.

Iba asayamung nung kanga junga shilem agitsü imlaja ataba lemsatepba mapang Patnaik-i, asayamung nung asayartemi parnok sempet tajungtiba nung sayatsü imlaba lemsatepba den senotsü teyari agütsütsü ajanga parnok training aser performance nung dang rangloker inyaksangshitsü atema teyari agütsütsü, ta Patnaik-i ashi.

Chhetri, Jhingan, Sandhu nung Asian Games nung masayatsü

Rongjui/September 13, 2023 (Agencies): India nung football asayar tejen Sunil Chhetri, Sandesh Jhingan, aser Gurpreet Singh Sandhu nung mezüngbo Asian games nung asayatsü aliba team nung züngoksema liasü saka Indian Super League (ISL) club temi international duty atema asayartem yoktsü memulungba sülen parnok masayatetsüsa kumogo.

Asian Games nung football asaya ya U23 asaya ka lir saka arishi kum 23 tema aliba asayar asem shilem agitsü melar.

Asayartem linük tenung nung asayatsü atema chioxtsü

asoshi ISL club temi memulungba sülen AIFF-i Hombarnü ISL club tem den senden ka mena liasü.

Osang ajanga ashiba agi, Asian Games ya FIFA international window nung shilem ka masü ta shia ISL club temi asayartem meyoktsü telemtetba agi.

ISL season tasenba ya September 21 nü tenzütsü aser Asian Games-a September 19 nü tenzütsü anungji asayamung ana ya mapang ka nung tenchiteper.

Osang ajangasa, club shia nungi asayar anana danga yokdaksütsü atema AIFF-i ISL club tem den senden ka amentsü. Ajisüaka iba atema

ano tetsükdaksü adoktsü, kechiyong IOA-i asayar tasentem agizükdaksütsü atema Olympic Council of Asia dangi application ka yoktsüsa akümtsü.

2023 kum India team-i kanga junga asaya title asem tashi benogo. Igor Stimac-i aniba team yagi SAFF Championships, Intercontinental Championship aser Tri-Nation Series kokogo.

Ajisüaka anogo ishika tejakdang Thailand nung asayaba King's Cup nungbo India team-i takok mongutet. Kum tepeyong kanga junga asayaba sülen India team FIFA World Rankings nung top 100-i ia tang 99buba nung lir.

ODI rankings: Shubman Gill tanabuba jenjangi tuogo

Rongjui/September 13, 2023 (Agencies): Bodhbarnü sayaba ICC Men's ODI rankings nung India nung opener Shubman Gill tanabuba jenjangi tuogo, koba pa indang career nung tang tashi nung jenjangi tajungtiba asütsü.

Top 10 nung India nung asayartem rongnung ano captain Rohit Sharma (8) aser Virat Kohli (9) nata densema lir.

India team nung tesüsa 2019 kum January ita ODI rankings top 10 nung asaya asem liasü. Iba mapang Rohit, Kohli aser Shikhar Dhawan nung top 10 nung liasü.

Bodhbarnü sayaba ranking nung Gill jenjang ka tejakdang tua liasü. Asian Cup nung Pakistan den asayaba mapang pai run 58 yanglua Rohit den senteper tongtumbang run 121 yangluba sülen tang pai iba jenjangi tongtetogo.

Kasa mapang nung Rohit-i

tang asaya aliba Asian Cup nung asaya asem atonga half-century yangluogo aser Kohli-ia Pakistan den asayaba mapang out mesüi run 122 yanglua jenjang ana tejakdang tuogo.

Batter tem rongnung pakistan nungia ODI rankings top 10 nung asayar asem lir. Rankings nung Pakistan captain Babar Azam, Gill dang nungi rating point 100 dak tema agi timba sür temaba jenjang nung lir aser pa den Imam-ul-Haq aser Fakhar Zaman nata 5 aser 10buba nung lir.

Maneni South Africa nung asayar Temba Bavuma-i taoba ODI asaya ti nung century asem aser half century ana yangluba sülen pa top-10-i taier dang lir. Pa jenjang ka tejakdang tua tang 11buba nung lir.

Australia nung asayar Davis Warner (4buba), Travis

Head (jenjang 6 tejakdang tua 20buba) aser Marnus Labuschagne (jenjang 24 tejakdang tua 45buba) nungera tejakdang tuogo aser India nung asayar KL Rahul (jenjang 10 tejakdang tua 37buba) aser Ishan Kishan (2 tejakdang tua 22buba) nata jenjangi tajungba kumogo.

Aiden Markram, Sadeera Samarawickrama, Liam Livingstone, Daryl Mitchell aser Devon Conway nungera jenjangi tajungba kumogo.

Bowler tem rongnung New Zealand nung asayar Trent Boult tanabuba jenjangi tuogo aser Australia nung bowler Adam Zampa tang mezüngbuba top 5-i iogo.

India nung wrist-spinner Kuldeep Yadav-i, Asia Cup nung asaya ana nung wicket teku agiba sülen pa jenjangi pongu tejakdang tua tang tenetbuba nung lir.

Lyon aser Coach Laurent Blanc na pilaogo

Rongjui/September 13, 2023 (Agencies): French championship tenetben tashi bener aliba club Lyon aser coach Laurent Blanc na pilaogo. French league season kanga mejungi tenzütkba sülen tang Laurent-i mapa toktsüogo.

Lyon puri asaya pezü sülen point ka dang nguteta lir aser tang tashi nung goal 10 chir lir. Parnok tang league table ponglang nung lir aser tesüsa parnok Paris Saint-Germain-i goal 4-1 agi kokogo.

Blanc-i Lyon coach mapang ita 11 benogo. Pa club den 2024 kum June ita tashi inyaksü atema tenangzüktepba yanglur liasü. Club kibur America nung shishilembar John Textor, aser taoba club kibu Jean-Michel Aulas na okadak ken o benoker mangatetep aliba mapang ka nung taoba France coach Blanc yagi off season nung asayartem alidenba indang ashishia liasü.

Lyon-i ashiba agi, Blanc aser club na tangatetep nung pai mapa toktsüogo. Pa den

assistant coach Franck Passi aser Philippe Lambert natia mapa toktsüogo.

Coach tasen ka meshim tashi deputy coach Jean-Francois Vulliez-i iba mapa bena atatsü. Pa nem taoba Lyon asayar Jeremie Brechet aser Sonny Anderson natia teyari agütsütsü.

Coach mapa bendaksütsü asoshi asadangertem rongnung taoba AC Milan aser Napoli manager Gennaro Gattuso-a densema lir.

Taoba season champion PSG point 23 agi memenepe tenetbuba nung tembangba sülen Lyon pur season tasenba kanga mejungi tenzütkogo, aser pongla nung aliba Lens team den kasasa goal ishiba idaktsüba den goal timtiba chir lir. Lyon pur taruba league asaya Deobarnü Le Havre den asayatsü.

Taoba France coach, Blanc-i Lyon pur 2009 kum takok dangi ani aser iba sülen pa lenisüba nung Paris Saint-Germain puri 2014 nungi 16 tashi season asem atonga league koka liasü.

Kohima nung Street Food... (Tapak 2 nungi...)

Administrator, Kohima Municipal Council, Lanusenla L. Peseyie-ia vendors tem dang food safety aser mürekmejuba yimya nung nungdakba osang ajak angazütsü aser iba training nungi Food Safety Training & Certificate (FoSTaC) agizütsü ayongzuka liasü.

Food safety dak sendakba nung jembidang, Assistant Food Safety Commissioner, Sendong Jamir-i vendors dang FACCI nung register asütsü aser registration paper pei indang stall nung teti ayutsü ashi.

Vendors temi chiyongtsü ya osettsüset shidak nung inoker agütsütsü aser totzü tanaben mamshitsüla, koba temang atema majung lir, ta pai ashi.

District administration tenung nung EAC Kohima, M.K. Jingru-ia chiyongtsü kumzuka

ayutsü aser temang müreka amshitsü nungdakba indang jembia liasü.

Vendors temi Good Management Practice (GMP), Good Health Practice (GHP) yimyatam amshitsüla aser stall nung jana indokba pongdang ana (takong aser tai) ayutsüla, ta Designated Officer of Kohima district, Peterson Aoi ashi.

Iba sentong nung menden Surojit Mukherjee, Senior Manager-Branch Corporate Affairs, Nestle India Ltd liasü. Maneni milen tsüklokba den mannequin saya aser iba sülen training session agia FoSTaC Certificate aser Hygiene kits lema agüja liasü. Iba training sentong nung Kohima jila nung aliba Street Food Vendors tem dena liasü.

NHAK nung Ayushman... (Tapak 2 nungi...)

Nüburtem aser talisa yimdak yimtsüng nung alirtem aser makamaiter nem health scheme tajungtiba nung agütsütsü nükjidong nung iba campaign ya tenzütk, ta pai ashi.

Ayushman Bhavan campaign nung tongtipang components asem lir aser itemji Ayushman cards lema agütsütsü mesüra "Ayushman Apke Dwar 3.0", "Ayushman Mela nungja agütsür health campaign ka aser "Ayushman Sabha" ama awareness senden

alitsü, ta pai ashi.

Linük tesem ajunga nung healthcare agütsütsü aser health awareness tuluba kumdaksütsü nükjidong nung iba sentong ya tenzütkba lir.

Iba sentong nung NHAK ajanga Mount Olive College nungi Professor Kavitali nem tetushi agüja liasü, shibai la azü tokuben buba tenlar aser tarutsü anogotem nunga ano tenlatsü tejangraba lir. Maneni sentong tembanga MS, NHAK, Dr. Margaret Yhome-i melepzüng o jembia liasü.

BILEMDANGANG

"Mapa ajak nung tajung ajitettsü merangang."